

Ho Etsahetse’ng?



SABATHA MANTSIBOEA

Bakeng sa Boithuto ba Beke Ena Bala:

Lipes. 100:3; Liketso 17:26; Gen. 2:7, 18–25; Gen. 1:28, 29; Gen. 3:15.

Teman’a Khopolo:

“Molimo oa ntoo re: A re etseng motho ka setšoantšo sa rona le ka ho tšoana ha rona. . .’ Eaba Molimo o etsa motho ka setšoantšo sa oona; oa mo etsa ka setšoantšo sa Molimo. Oa ba etsa e le e motona le e motšehali” (*Genese 1:26, 27*).

Tlaleho ea Bible ea Tlholeho ea botho ke e tletseng ka tšepo, thabo, le phetheho. Letsatsi ka leng la tlhohleho le qetella ka phatlalatso e halalelang ea hore ho “molemo.” Ka ho hlaka taba eo e ne e sa kenyelletsa maholiotsoana, litšisinyeho tsa lefatše, tlala, le mafu. Ho etsahetse’ng? Letsatsi la botšelela la Tlhohleho le qetelletse ka phatlalatso e halalelang ea hore ho “molemo haholo.” Ke hobane ka letsatsi leo Jehova o ile a bopa libopuo ka setšoantšo sa Hae: batho. Ntho eo a neng a e-so e etse ka tsohle tse ling tlalehong ea Genese. Libopuo tse, ehlile li ne li phethehile ka tsela tsohle; li ne li lokela ho ba joalo. Haholo hobane li ne li entsoe ka setšoantšo sa Molimo. Ka mokhoa o joalo, ho ne ho se ka moo li ka kenyelletsang babolai, masholu, bathetsi, baqhekanyetsi le ba khopo har’a bona. Ho etsahetse’ng? Thuto ea beke ena e talima Tlhohleho, ho seo Molimo a se entseng qalong, e be hamorao ho se ileng sa etsahalla Tlhohleho eo e phethehileng. Qetellong, e ama mooko taba oa kotara ena: seo Molimo o se etsang ho lokisa litaba hape.

Beke ka Bokhutšoanyane: Bible e ruta eng ka qaleho? Molimo o ne o batla kamano e joang le batho? Morero oa sefate sa tsebo ea botle le bobele ne e le o fe? Adama le Eva ba ile ba fuoa tšepo e fe hang hoba ba oe?

**Ihute thuto ea beke ena ho lokisetsa Sabatha sa la 3 ‘Mesa.*

Likhulu ho theosa joalo . . .

“Tšimolohong, Molimo o no o hlole maholimo le lefatše” (Gen. 1:1). Ramahlale one a qeta ho ruta ka kamoo mafatše a potolohang letsatsi kateng, le kamoo letsatsi le bilikang bohareng ba boieane ba mafatše le linaledi (galaxy), ha nkho e mong ea roetseng lieta tsa li tennis tse ntšo a ema a re lefatše le selikalikoe se sepapetloa se lutseng mokokotlong oa khulu. Ka ho soasoa ramahlale a botsa na khulu eona e lutse holim’a eng, eaba o araba ka hore e lutse holim’a khulu e ‘ngoe. “‘Me,” ramahlale a tsoela pele ho soasoa, “joale khulu eo eona e lutse holim’a eng?” A arabela, “Khulu e ‘ngoe,” empa pele a ka botsa hore na khulu eo eona e lutse holim’a eng, a tsoka monoana fahlehong sa hae a ba a khahlela, a re, “Boloka matla a hau mora, ke likhulu molebe.” Leha e le monate joalo, pale eo e sebetsana le taba ea bohlokoahali ea boteng ba motho—sebopeho sa tlholeho ka bo sona. Lefatše lena leo re iphumanang har’a lona ke eng kante ho khetho ea rona? Hobaneng ha re le moo? Re fihlile joang moo? ‘Me re tlo qetella re ile kae? Tsena ke lipotso tsa mantlha tsa motheo tseo batho ba li botsang, hobane kutloisiso ea rona ka hore na re bo mang le kamoo re fihlileng mona e ama kutloisiso ea kamoo re phelang ka teng le kamoo re itšoarang kateng ha re le mona.

Bala litemana tse latelang: Gen. 1:1; Lipes. 100:3; Esa. 40:28; Liketso 17:26; Baef. 3:9; Baheb. 1:2, 10. Ke joang temana ka ‘ngoe ka tsela ea eona, e arabang lipotso tse kaholimo? Ke ntlha e fe eo li tšoanang ka eona?

Se thahasellisang ka Genese 1:1 (kapa litemana tse ling) ke hore Morena ha a leke ho kholisa hore ke Eena ‘Mopi. Ha ho na mabaka a batsi a ka behoang ho pharalatsa taba eo. Ho ena le hoo, e behoa ka bobebe le ka ho hlaka, ho se teko ea ho beha mabaka, ho e hlalosa, kapa ho kholisa. Ke feela hore re ka e amohela ka tumelo, kapa che. Hantle-ntle tumelo ke eona feela tsela eo re ka e amohelang ka eona, ka lebaka le le leng le bonolo: ho n’o se teng le ea mong oa rona ho bona ha ketsahalo ea Tlholeho ka bo eona. Ha se ntho e neng e ka etsahala hore e be re ne se ntse re le teng tlhohelong ea rona. Le ba sa lumeleng ho Molimo, ho sa natse na maikutlo a bona ke a fe, ba lokela ho ba le maikutlo a joalo ka tumelo ka mabaka a tšoanang le ao rona ba lumelang ho tlholeho re nang le ona: ho no se teng le ea mong oa rona ho boha ketsahalo eo.

Leha ho le joalo, leha e ba Molimo o ne a re laetse ho lumela ho Eena e le ‘Mopi, ha a re laele ho lumela feela a sa re fa mabaka a molemo a ho lumela. Ka ho ela hloko hore ho na le tekanyo e itseng ea tumelo e hlokehang ntho tse ka bang tsohle tseo re li lumelang, ngola fatše mabaka a hore ke hobaneng ho utloahala ho ba le tumelo ea hore re mona hobane ‘Mopi a re beile mona ka morero, ho ena le hore e be motso oa rona o ithlahela boiketsahallong ba tšohanyetso.

Ka Setšoantšo sa ‘Mopi (Gen. 1:27)

Bibele e hlalosa hore Molimo o bopile motho—e le e motona le e motšehali—“ka setšoantšo sa Oona” (Gen. 1:27). Araba lipotso tse latelang u ipapisitse le taba ena:

1. Ho bolela’ng hore Molimo o re entse ka setšoantšo sa oona? Re “setšoantšong sa oona” ka litsela li fe?

2. Ho latela tlaleho ea Genese, a na Jehova o ile a etsa ho hong hosele ka “setšoantšo sa Hae” kante ho motho? Ha ho se joalo, seo se re bolella eng ka boemo ba rona bo ikhethileng, ka ho fapana le tlholeho eohle ea lefatše? Re ka ithuta eng phapanong ee?

3. Ke eng se seng se ka fumanoang tlalehong ea tlholeho ea motho se mo khethollang le eng kapa eng eo Jehova a e hlotseng? Sheba Gen. 2:7, 18–25.

Leha re lokela ho bua ka Molimo ka mantsoe a botho, ha rea lokela hore ke Oa moea. (Johanne 4:24), ‘me o na le limelo tse bomolimo. Seo re ka se bolelang ke hore libopehong tsa rona tsa ‘mele, kelello, le moea, re bontšahatsa ‘Mopi oa rona ka tsela e itseng, empa leha ho le joalo, ho ntse ho setse ho hong ka Eena hoo, bonyane ho rona, ho ntseng ho setse e le sephiri. Leha ho le joalo, Bibele e thathiselletsa holim’a karolo ea moea le ea mehopollo ea kelello ea rona. Likarolo tsena re ka li ntlafatsa le ho li holisa. Ke ho khetheha ha kelello ea motho ho etsang hore ho khonahale ho ba le kamano e ntlafatsang le Molimo, e leng ntho eo tsohle tse ling tse bopiloeng ke Molimo li bonahalang li sitoa ho e etsa.

Hlokomela, hape, tlaleho e ikhethang ea kamo Molimo o entseng mosali. Monna le mosali ka bobeli ba na le tlotla ea ho etsoa ka setšoantšo sa Molimo. Popong ea bona, ha ho bonahale ho tsoaeloa hore ho na le ea katlasana ho e mong. Molimo o ba entse ka bobeli ka sesebelisoa se tsoanang. Molimo o ba entse ba lekana ho tloha sethathong oa ba bea hammoho kamanong e khethehileng le Eena. Ka bobeli ba ne ba e-na le monyetla oa ho ntlafatsa limelo tsa bona tseo ba li neiloeng ke Molimo ka tsela e neng e tla tlisa khanya ho Eena. “Molimo ka sebele sa Hae ke Eena ea fileng Adama molekane. O ile a mo etsetsa ‘molekane ea tsoanang le eena’—mothusi ea tsoanang le eena—ea neng a lokeloa ke ho ba molekane oa hae, eo e tla ba ntho e le ‘ngoe le eena ka lerato le kutloelo-bohloko. Eva o bopiloe ka lehopo le ntšitsoeng lehlakoreng la Adama, ho bontša hore ha a lokela ho mo laola joalo ka hlooho, kapa a hatakeloe ka maoto ke eena joalo ka ea fokolang, empa e le ho ema lehlakoreng la hae joalo ka ea lekanang le eena, ea lokelang ho ratoa le ho sireletsoa ke eena.”—Ellen G. White, *Patriarchs and Prophets*, leq. 46.

Molimo le Motho Hammoho

(Gen. 1:28, 29)

Hlokomela mantsoe a pele ao Molimo o oa buileng le motho, bonyane kamoo a hlahang kateng Lengolong. O ba supisa bokhoni ba bona ba ho ikatisa, ho hlahisa ka bongata mofuta oa habo bona. O boela o ba supisa lefatše ka bo lona, tlhaho, 'me o ba laela ho e hlokomela, le ho e busa, ho rena holim'a eona. O ba supisa hape limela tseo ba ka li jang. Ka bokhutšoanyane, ho latela Biblele, mantsoe a pele a Molimo ho monna le mosali a shebane ka ho otlolloha le kena-kenano le kamano ea bona le lefatše le tšoarehang.

Genese 1:28, 29 li re bolella eng ka tsela eo Molimo o talimang lefatše le tšoarehang? Na li supa hore ho na le se se be ka lintho tse tšoarehang le ho natefelo a ha rona ke tsona? Re ka ithuta eng liketsahalong tsee tsa pele-pele nalaneng ea motho ka tsela eo re lokelang ho amana le tlholeho ka bo eona?

Hape, ka mantsoe ana, Molimo o nka khato ea pele e lebisang likamanong le motho. O bua le bona, o ba fa litaelo, o ba bolella seo ba lokelang ho se etsa. Ho na le boikarabelo bo tšoaeloang le mantsoeng. Molimo o ba laetse ho ba marena holim'a tlholeho ena e makatsang eo a e entseng ka sebele sa Hae.

Genese 1:28 e re Molimo o ile a hlohonolofatsa Adama Eva. Seo se bolela'ng? se supa kamano e fe pakeng tsa bona le 'Mopi oa bona?

Molimo o bua le Adama le Eva joalo ka libopuo tse nang le kekelo ba ka arabelang mosa oa Hae 'me ba kena puisanong le setsoalleng le Eena. Hape joalo ka bana ba libopuo, Adama le Eva ba ne ba itšetlehile holim'a tlhohonolofatso le tlhokomelo ea ea 'Mopi Ntat'a bona. O fane ka sohle seo ba se hlokang. Ha ho na seo ba se entseng ho lokeloa ke seo a ba neileng sona. E ne e le baamoheli ba ntho eo ba sa e sebelletsang.

Ha re bala ka popo ea monna le mosali, re bona mehlala, pele ho sebe, ea mofuta oa kamano eo Molimo a batlang re be le eona le Eena hona joale, kamor'a sebe. Hlahloba boithuto ba letsatsi hape 'me o bone na ke eng tse tšoanang tseo u ka li fumanang tse ka u thusang hore na re ka amana le Eena joang le boemong ba rona bo oeleng.

Sefateng

“Jehova Molimo a laela motho, a re: ha e le lifate tsohle tsa tšimo, u tla li ja; empa ha e le sefate sa ho tseba botle le bobele, u se ke oa se ja, hobane mohla u se jang, u tla shoa” (Gen. 2:16, 17). Teko ena e ne e fa Adama le Eva monyetla oa ho sebelisa bolokolohi ba bona ba kelello. E ne boetse e ba qholotsa ho arabela kamano ea bona le ‘Mopi oa bona hantle kapa hampe. E bontša hape hore Molimo o ne o ba entse e le libopuo tse nang le bolokolohi ba boitšoaro. Haholo hobane, haeba ba ne ba se na monyetla oa ho hloka kutlo, hobaneng ha Morena a ne a ka itsoenya ka ho ba hlokomelisa, ho tloha sethathong, khahlanong le ho hloka kutlo?

“Ntho e ‘ngoe le e ‘ngoe e tšileng pele ho khaolo ena e betlile tsela e lebisang hlorong ena [Gen. 2:16, 17]. Bokamoso ba moloko ona bo itšetlehile holim’a thibelo ena e le ‘ngoe. Motho ha a lokela ho ferekanngoa ke litaba tse ngata-ngata. Ke taelo e le ‘ngoe e halalelang e lokeloang ho bolokoa ka kelellong. Ka ho boloka lenane la litaelo ho fella ho e le ‘ngoe, Jehova o fana ka sesupo sa mehauhelo ea Hae. Ka thoko ho moo, ho bontša hore taelo ena e le ‘ngoe ha e boima, Morena o e beha har’a khetho e batsi: ‘Ha e le lifate tsohle tsa tšimo, u tla li ja.’” —H. C. Leupold, *Exposition of Genesis* (Columbus, OH: Wartburg Press, 1942), pok. 1, leq. 127.

Ka ho biletša Adama le Eva hore ba utloe thato ea Hae, Molimo o ne a re: Ke ‘na ‘Mopi oa hau, ‘me ke u entse ka setšoantšo sa Ka. Bophelo ba hau bo tšehelisoetse ke ‘Na, hobane u phela ka ‘Na, u sisinyeha ka ‘Na ‘me u teng ka ‘Na. ke fane ka lintho tsohle molemong oa boiketlo le thabo ea hau (tšehetso, lehaee, bolekanane ba botho) ‘me ke u hlomamisitse ho ba ‘musi oa lefatše lena katlase ho ‘Na. Haeba u ikemiselitse ho tiisa kamano ena le ‘Na hobane u nthata, ke moo ke tla ba Molimo oa hau, ‘me le tla ba bana ba Ka. ‘Me o ka tiisa kamano ena le tšepo e kenelletseng ho eona ka bobebe feela ba ho mamela molao ona o khethollohileng. Qetellong, kamano ea rona le Molimo e ka ba e atlehileng hape e tsoellang ha feela re khetha ka bolokolohi ho amohela thato ea Hae. Ho nena thato ea Hae, ka bokhutšoanyane, ke ho ipatlela ho ikemela thoko ho Eena. Ho bontša hore re lumela hore ha re mo hloke. Eo ke khetho e tlišoang ke ho tseba bobele, ‘me bobele bo isa karohanong, bolutung, maqakabetsing, le lefung.

Teko eo Molimo a e fileng Adama le Eva e ne e le ea botšepahi le tumelo. A na ba tla tšepahalla ‘Mopi, ea ba neileng sohle seo ba se hlokanang, le lefatše la menyaka, kapa ba tla ikhethela ho tsamaea ka tsela ea bona, e khahlanong le thato ea Hae? A na ba tla ba le tumelo e lekaneng ho Eena hore ba mo utloa lentsoe la Hae? Botšepahi ba bona le tumelo li ile tsa lekhoa ka sefate sa tsebo ea botle le bobele. Re tobana le liteko tse tšoanang joang letsatsi le letsatsi? Molao oa Molimo o sebetsa joang ka tsela e tšoanang le taelo e fanoeng ho Genese 2:16, 17?

Ho Khaola Maqhama

Re na le tšekamelo ea ho lumela batho bao re ba tsebang e be meea ea rona e hanana le batho bao re sa ba tsebang. Ka tlhaho Eva o na lokela ho se tšepe Satane. ho feta moo, tlhaselo e fe kapa e fe e khahlanong le Molimo ka ho otloloha e ne lokela ho mo etsa hore a itšireletse. Ke mehato efe eo Satane a ileng a e nka ho feta lekaro la tlhaho tšireletso la Eva? (Gen. 3:1–6).

“Leha tlōlo ea Eva e ne e le mpe ha kaalo e bile e tletse monyetla oa bomalimabe bakeng sa lelapa la botho, khetho ea hae e ne e sa kenyetsetse moloko oa botho kotlong ea tlōlo ea hae ha kaakang. Ebile khetho ea boomo ea Adama, ea neng a na le kutloiso e felletseng ea taelo ea Molimo—ho e-na le ea hae [Eva]—e entseng hore sebe le lefu li aparele batho bohle. Eva o ne a thetsitsoe; Adama o ne a sa thetsoa.”—The SDA Bible Commentary, pok. 1, leq. 231. Ka lebaka la tlōlo ena e totobetse le ho se natse taelo ea Molimo, maqhama pakeng tsa Molimo le motho a khaohile. Ho fetohile ho tloha kamanong ea setsoalle le Molimo ho isa palehong ea tšabo ho tloha pel’a boteng ba Hae (Gen. 3:8–10). Tlhobohano le karohano li nkela setsoalle le kopano sebaka. Sebe sa hlahella, ‘me hamorao ha latela litholoana tsa sona tse bosula. Ntle le hore e be ho ile ha etsoa se seng, motho o ne a ea timelong ea ka ho sa feleng.

Mahareng a maqakabetsi ana, ke mantsoe a fe a tšepo le tšepiso ao Molimo a a buileng? (Sheba Gen. 3:15)

Mantsoe a makatsang a Molimo a boporofeta ba tšepo a bua ka hloeano e theiloeng ke leholimo mahareng a noha le mosali, le mahareng a peo ea hae lea noha. Hloro ea taba ena e bile ho hlaheng ha Ngoana eo e neng e le moemeli oa peo ea mosali ea ileng a khoba hlooho ea Satane ka matla a timetsang, ha eena e tsebile feela ho loma serethe sa Mesia. Boemong ba bona ba ho hloka thuso, Adama le Eva ba ne ba lokela ho fumana tšepo tšepisong ena ea Mesia, tšepo e neng e tla fetola bophelo ba bona, hobane tšepiso ena e ne e fanoe ke Molimo ‘me e na le tšebetso ea Molimo. Tšepiso ena ea Mesia le ea tlhoho ea ho qetela, leha e ne e beiloe ka ho sehlake ha kaalo nakog eo, e ile ea tlosa bosula boo sebe se neng se ba kentse kahare ho bona.

Bala Genese 3:9, moo Molimo o reng ho Adama “‘U hokae na?’” ‘Nete ke hore Molimo o ne o tseba moo ba leng teng. Mantsoe a Hae ho e-na le ho tlala kahlolo, a ne a hulela motho ea tletseng ka molato ho Eena. Ka bokhutšoanyane, mantsoe a pele a Molimo ho motho ea oeleng a tlile a na le tšepo ea mohau le khauho ea Hae. Re fumana ka litsela li fe, le ha joale, Molimo a ntse a batla ho re biletsoa mohaung le khauhong ea Hae?

Ho Ithuta Haholoanyane:

Bibele ea tšoloha ke li khooeletso ho moetsalibe le mokoenehi. Bapisa Lipes. 95:7, 8; Esa. 55:1, 2, 6, 7; Luka 15:3–7; Luka 19:10. Tse ling ke li fe tseo u ka li fumanang? Bala Ellen G. White, “Tlholeho,” maq. 44–51; “Teko le hoOa,” maq. 52–62; le “Leano la Topollo,” maq. 63–70, ho *Patriarchs and Prophets*. “Ke nahana ho ne ho na le thero ea evangeli, mants'oeng ao a mararo a halalelang ha a phunyelletsa mofilibithing oa mofero, ‘me oa fihlela litsebe tse hlohlonang tsa ba phaphathehi—‘U hokae na? Molimo oa hau ha a batle ho lahlehela ke uena; o tlike ho tla u batla, joalo ka ha ha nako e ntse e feta a tla tla ka Sebopeliso sa Mora oa Hae, e seng feela ho batla empa le ho pholosa ho lahlehileng.”—Charles Haddon Spurgeon, *The Treasury of the Bible* (Grand Rapids, MI: Zondervan Publishing House, 1962) Old Testament, pok. 1, leq. 11.

Lipotso tsa Puisano:

1. Hobane Molimo o mosa o tsotellang ke Ona o batlang motho, re ka arabela sesupo see sa lerato la Ntatea le Jesu Krete joang le hona joale? Morena o lebeletse re arabele joang?
2. Bapisa setšoantšo sa Bibele sa motho ha a oele le seo a neng a le sona tlholehong ea Molimo ‘me a le bohloking ba topollo le maikutlo a tšimoloho le khatelo pele ea tšohanyetso. Ke e fe e fanang ka tšepo e fetisang, ‘me hobaneng?
3. Likamano tsa lerato li bohlokoa ha kae thabong ea motho? Hobaneng ha khokahano e ntlafetseng le Molimo e le bohlokoa bakeng sa likamano tse joalo? Buisanang ka tšusumetso ea likamano tsa batho tse phetseng hantle holim’a motho ea likamanong tse joalo (motsoali-ngoana, motsoalle-motsoalle, monna-mosali, mohiri-mohiruoana, jj.).

Kakaretso: Molimo o re ntse ka setšoantšo sa Oona e le hore ho tle ho be le likamano tsa lerato mahareng a Hae le rona. Lehla ho kena ha sebe ho soahlamantse kopano ea pele-pele, Molimo o batla ho buseletsa kamano ena ka moralo oa topollo. Joalo ka libopuoana tse itšetlehileng, bophelo bo ba le moelelo oa ‘nete le ho hlaka ha feela re kena kopanong le ‘Mopi oa rona.